

Juventud den Mouecion

Pa: Mercedes Abdul

Kwokfai Wong

EXCELENTE PINTOR Y EMPRESARIO CU APENAS 21 AÑA DI EDAD



ORANJESTAD (AAN): Den e edicion pa hubentud awe, ta trece den publicidad un valor hoben di Aruba, kende por cierto a enfatiza hopi mes cu tur loke e ta awendia ta gracias a su mayornan, su tata y su mama, cu a motive hopi pa e desaroya su aptitudnan, y pa e motibo aki e kier bisa su tata cu mama masha danki mes, pa haci posible e historia cu DIARIO ta trece dilanti na continuacion.

RAYO DI SOLO

Kwokfai ta corda cu el a cumenza pinta for di mucha, ora e tabata na school basico. E tabata bay na School Rayo di Solo na San Nicolas. Eyden e tabata gusta pinta Ultraman, Batman entre otro.

E ta corda cu den e tempo ey e, cu otro alumnonan tabata pusta ken ta pinta miho. E tabata haya les di pin-

tamento y su juffrouw tabata pidi e pa pinta cierto cosnan pa e clas of pa e school. Despues el a bay na Mon Plaisir College na Oranjestad, unda el a sigui pinta. El a bay MAVO y despues na Colegio Arubano.

El a cumenza pinta caricatura, diferente animal manera Yiwana, Macaco, etc., for di tempo cu e tabata na Mon Plaisir. Ora el a bay Colegio e tabata tin un bon tecnica y el a profundiza den esey. Na aña 1989 el a bay Merca y a studia Arte Comercial of Publicidad pa traha cu Advertising, lay out, etc. E no a siña pintamento pasobra e tabata domina esey caba.

El a siña diferente estilo na Merca y el a gradua na aña 1991 como Publicista. Poco despues el a worde scoge pa traha den un compania na Merca, unda el a traha durante 7 luna y pa su bon trabao nan

a promove como Hefe di Artistanan.

Durante e tempo ey su mama a papia cune pa e bini Aruba habri un lugar di T-Shirt. E tabata pensa di habri e tienda mas tanto pa turistanan. El a acepta y tabata manda diseñonan for di Merca.

Despues el a topa cu dos amigo y conhuntamente a pensa riba algo mas cu traha T-Shirt pa turista. Asina nan a lanta "ISLA", cual tienda a habri na Augustus di aña 1992. Akinan e ta traha su diseñonan y ta vende rollerblades y ademais di esey, e ta organiza competencianan di Rollerblades.


PINTAMENTO

Kwokfai ta gusta pinta mas tanto caricatura, pero tambe e tin un gran habilidad pa pinta retrato, cual pe ta nifica un hobby. Pa e pinta un potret e ta tarda cinco dia mas of menos, y e mester ta tranquil y conta cu suficiente tempo. Actualmente e ta hayando peticion pa pinta retrato di e mama di algun amigo of nan yiu, pero e no ta negocia cu esey.

Tin biaha e ta pinta paisahe, pero e ta considera cu mayoria pintor di Aruba ta pinta landscape, y e ta prefera haci algo otro. Por nota cu e ta pone su "seyo" di distincion den e retratonan mes, manera por mira riba potret. Por cierto el a sinti hopi mes cu no a worde yama nunca pa participa den Mira Arte, cual exposicion el a bishita y a admira hopi mes. E ta considera cu e tabata tin e capacidat pa participa den dje.

Como pintor e hoben ta considera cu na Aruba ta dificil pa haya tur material necesario y loke tin ta masha caro mes. E tin cu trece mayoria material for di Merca. Tampoco tin lugar pa laga haci un logo chiquito unda e por bay pidi un diseño di cierto size. E ta purba busca lugarnan asina pero e no ta haya.

Su deseo ta pa lanta un dia



EXPOSICION

Kwokfai Wong tin interes den participa den algun exposicion si e worde invita. E ta pinta mas tanto futurista aunque no a drenta den profundo den surrealismo.

Su pintor prefera ta Van Gogh cu Picasso y tambe Picasso.

E ta haya necesario pa hende local, pa pueblo mas duna mas apoyo na su artistanan. E ta haya cu e artistanan mes mester percura pa muestra mas nan potencia door di mas exposicionnan, pasobra ta ora cu e publico ta conoce mas loke e artistanan ta haci nan por dune un empuhe.

MENSAHE

"Mi ta kere cu si e hobennan tin nan soñonan, nan mester percura pa nan bira realidad. Stop di soña pero traha duro pa proyectanan. Duna bo mes bo prome "stap" pasobra ningu hende ta bay haci e pa bo".

ESTIMULO

Kwokfai ta kere cu tur hende por haci algo positivo y productivo riba su mes, envez di cay den vicio di bebida, droga of algo asina. E personalmente no ta mira necesidad di bebe pa pasa bon den un fiesta. E ta kere den diversion sano. Loke si ta cu esun cu kier logra algo den bida mester traha duro pe.

"Mi ta kere cu mayoria hoben cu ta cay den vicio di alcohol of droga, ta falta motivacion, sea na cas of di nan mes. Tur hende mester kere den nan persona mes. Aunque tin tanto inseguridad den tur cos riba mundo, cada kende mester ta optimista", el a bisa. E ta kere cu un bon base na cas, y e ta sinti hopi satisfecho di ta un hoben sano.